



RUFO WEVER

A



FALLECE



Diavie ne anochi mas o menos 7'or a fallece na Aruba despues di un temporada sufriendo di quebrante di salud, e compositor y musico Rufo Wever. Rufo Wever a cuminza tuma les di piano na edad di seis aña, y 9 aña despues huntu cu algun amigo a forma e orquesta Melody Band cu algun amigo.

Cu e orquesta aki, Rufo cu tabata pianista a drenta den e tereno musical di Aruba. E tabata tocador alavez cu instrumentonan manera saxophone, clarinet y guitarra, cual instrumento el a siña toca ariba su mes. Rufo a forma parti di diferente agrupacion musical ariba Aruba y hopi artista di Aruba a ser acompaña musicalmente pa e gran musico y compositor aki. Na 1937 e tabata guitarista di e conhunto Arubano Trobadores Tropicales. E conhunto aki a actua exitosamente den tur teatro di Aruba y tambe na Corsow den teatro Cinelandia y Radio Curom cu e temponan ey a cuminza transmiti.

E promer composicion di Rufo Wever tabata Arubanita, cual wals a ser balia na Aruba pa La Reina Juliana durante un bishita na Antillas. Arubanita a ser compone na 1935. Despues el a compone un cantidad di piesa mas cualnan a ser graba ariba diferente marca di disco. Na 1938 Rufo a cuminza traha piesa pa caha di orgel pa Aruba y Corsow. El a haci e trabao aki te 1972 pero mester a laguele para pa motibo cu su bista a cuminza bai atras. Na 1941 den un desgracia di auto el a perde su man robey, di manera cu el a inventa un brazo artificial pa e por a sigui cu su promer amor cu ta tocamento di piano.

Despues di e desgracia den cual el a perde su braza, el a kere cu jamas e por a sigui traha of

toca mas. Despues di a sobrepasa su tristesa, el a sigui yuda cu piesanan pa caha di orgel y debido na su amor pa musica el a inventa su braza artificial cu cual e por a toca e nootnan di baho di piano asistiendo su man drechi.

Di e manera ey el a reaparece tocante primeramente na radio y despues na 1964 el a aparece na television na Aruba na unda el a actua regularmente te na aña 1972. Rufo a graba varios disco ariba 78, 45 y longplay. Tambe el a graba hopi piesa pa caha di orgel. A pesar di e condicion despues di e desgracia, e no a biahá mucho pa motibo cu su rudia robey tambe a keda den malestado. El a biahá sin embargo un poco y a toca na Corsow, Costa Rica, Venezuela y durante di un fiesta grandi na Puerto Rico. Na 1967 Sociedad Bolivariana a otorga na Rufo un diploma honorifico pa su labor di hopi aña ariba tereno cultural na Aruba. Na 1975 el a ricibi condecoracion di La Reina Juliana den orde "Ridder in de Orde van Oranje Nassau".

Esaki pa dedicacion di su bida na musica den varios aspecto. Na ocasion di inauguracion di Himno y Bandera di Aruba, Gobierno di Aruba a obsequia Rufo un plakaat como co-compositor y autor, hunto cu su colega musico Padu Lampe, di Aruba Dushi Tera cu a bira himno oficial di Aruba. Despues Rufo tabata warda ariba un album musical cu el a scirbi y a ser imprimi na Hulanda y cual ta na benta den tur libreria. Rufo Wever a fallece, diavie na, 22 dia despues di a cumpli 60 aña; Dignitarionan di varios isla di Antillas, huntu cu coleganan musico, un gran cantidad di conocir y amigonan di Rufo a acompaña e ayera tardi pa su ultimo lugar di sosiego. Cu fallecimiento di Rufo Wever, Aruba a perde e musico di mas grandi cu e isla aki a yega di conoce.